

AUGLÝSING

um umferð í Garðabæ.

Samkvæmt heimild í a-lið 2. mgr. 81. gr. umferðarlaga nr. 50/1987 og að fenginni tillögu bæjarstjórnarinnar í Garðabæ ákveðst bann við lagningu ökutækja í Krókamýri, beggja vegna götunnar. Bannið taki gildi 1. júlí 1992.

Bæjarfógetinn í Garðabæ, 15. apríl 1992.

Már Pétursson.

Nr. 150

22. apríl 1992

REGLUGERÐ

um fjárhagslega aðstoð við framfærendur fatlaðra og sjúkra barna.

1. gr.

Framfærendur fatlaðra og sjúkra barna frá þriggja mánaða og allt að 16 ára aldri, sem dvelja í heimahúsi, eiga rétt á fjárhagslegri aðstoð, ef sjúkdómur eða andleg eða líkamleg hömlun hefur í för með sér sannanleg tilfinnanleg útgjöld eða sérstaka umönnun og gæslu.

2. gr.

Með hugtakinu fatlað barn er átt við barn sem vegna greindarskerðingar, geðrænna truflana eða líkamlegrar hömlunar þarf sérstaka þjálfun og aðstoð á uppvaxtarárum sínum.

Með hugtakinu sjúkt barn er átt við barn, sem þarfnast læknisfræðilegrar meðferðar vegna alvarlegs og/eða langvinns sjúkdóms.

3. gr.

Tryggingastofnun ríkisins úrskurðar og annast greiðslur þessar og metur læknisfræðilegar forsendur umsækjanda og fötlunar- eða sjúkdómsstig, sbr. 4. gr. Svæðisstjórnir málefna fatlaðra gera tillögur um greiðslur vegna þeirra barna, sem njóta þjónustu samkvæmt lögum um málefni fatlaðra. Tillögur skulu berast Tryggingastofnun ríkisins eigi síðar en 14 dögum eftir að umsókn er lögð fram.

4. gr.

Greiða skal framfærendum fatlaðra og sjúkra barna styrk að hámarki kr. 9.092 miðað við 12 - 40 klst. þjónustu á mánuði, sbr. greiðsluviðmiðunartöflu.

Greiða skal framfærendum fatlaðra og sjúkra barna umönnunarbætur, miðað við 40 - 175 klst. þjónustu á mánuði, sbr. greiðsluviðmiðunartöflu. Tryggingaráði er heimilt að hækka viðmiðun í allt að 200 klst., mæli sérstakar ástæður með því að mati tryggingayfirlæknis eða svæðisstjórnar. Hámarksfjárhæð greiðslu fyrir 175 klst. umönnun á mánuði er kr. 47.111,00 frá 1. janúar að telja. Dagleg þjónusta, sem barn fær utan heimilis skerðir umönnunarbætur.

Heimilt er að meta til hækkunar greiðslna, ef um sannanleg tilfinnanleg útgjöld er að ræða, t.d. mikinn ferða- og dvalarkostnað vegna lækni meðferðar. Einnig er heimilt að úrskurða framfærendum fatlaðra og sjúkra barna bifreiðastyrk, sbr. 20. gr. laga um almannatryggingar.

Við útreikning á greiðslum til framfærenda er eftirfarandi viðmiðun lögð til grundvallar, byggð á upplýsingum frá greiningaraðila, þjónustustofnunum og framfærendum:

Skilgreiningar á fötlunar- og sjúkdómsstigi.**I. Flokkun vegna umönnunar- og gæsluþarfar og útgjalda, miðað við stig fötlunar og aldur barns.**

- Fl.1 Börn, sem vegna mjög alvarlegrar fötlunar (fjölfötlunar) eru algjörlega háð öðrum með hreyfifærni og/eða flestar athafnir daglegs lífs.
- Fl.2 Börn, sem þurfa verulega aðstoð eða gæslu í daglegu lífi, t.d. vegna alvarlegrar þroskahömlunar, verulegrar hreyfihömlunar (hjólástóll/hækjur) verulegrar tengsla-skerðingar (einhverfu). Blinda.
- Fl.3 Börn, sem þurfa reglulega aðstoð, t.d. vegna miðlungs þroskahömlunar, hreyfihömlunar (spelkunotkun, aðstoð við ferli), verulegrar heyrnarskerðingar (táknmál) eða verulegrar sjónskerðingar.
- Fl.4 Börn, sem þurfa töluverða námsaðstoð, þjálfun og nokkra aðstoð í daglegu lífi, t.d. vegna málhömlunar, vægrar þroskahömlunar eða verulegs misþroska eða hegðunar-vandkvæða.
- Fl.5 Börn, sem þurfa fyrst og fremst umönnun vegna þjálfunar og eftirlits sérfræðinga.

II. Flokkun vegna umönnunar- og gæsluþarfar og útgjalda sjúkra barna miðað við stig sjúkdóms og aldur barns.

- Fl.1 Börn, sem þurfa langvarandi vistun á sjúkrahúsi eða yfirsetu foreldra í heimahúsi vegna lífshættulegs sjúkdóms.
- Fl.2-3 Börn, sem þurfa reglulegar lyfjagjafir eða geislameðferð með tíðum sjúkrahúsinn-lögnum vegna alvarlegs sjúkdóms.
- Fl.4 Börn, sem foreldrar þurfa að gefa reglulegar lyfjagjafir í sprautuformi eða sjá um hjálpartæki (stomapoka, þvaggpoka).
- Fl.5 Börn, sem þurfa aðstoð vegna reglulegra lyfjagjafa í sprautuformi, aðstoð við hjálpartæki. Börn, sem eru að nokkru sjálfbjarga. Börn, sem þurfa reglubundið eftirlit og langvinna lyfjagjöf um munn t.d. börn með flogaveiki.

Greiðsluviðmiðun m.t.t. ofangreindrar flokkunar og daglegrar þjónustu utan heimilis virka daga er þessi:

Þjónusta utan heimilis	< 2 klst	2 klst	4 klst	6 klst	≥ 8 klst
		< 4 klst	< 6 klst	< 8 klst	
1. fl.	175 klst	153 klst	131 klst	87,5 klst	44 klst
2. fl.	153 klst	131 klst	87,5 klst	44 klst	40 klst
3. fl.	131 klst	87,5 klst	44 klst	30 klst	30 klst
4. fl.	87,5 klst	44 klst	20 klst	20 klst	20 klst
5. fl.	44 klst	12 klst	12 klst	12 klst	12 klst

5. gr.

Umsóknir framfærenda skv. reglugerð þessari skulu sendar Tryggingastofnun ríkisins á sérstökum eyðublöðum, sem stofnunin lætur útbúa. Greiningaraðili skal senda tryggingayfir-lækni upplýsingar um læknisfræðilega greiningu og aðstæður viðkomandi barns.

Vegna þeirra barna, sem njóta þjónustu skv. lögum um málefni fatlaðra skal umsókn send til viðkomandi svæðisstjórnar, sem kannar vandlega aðstæður hins fatlaða. Greiningar-aðili skal senda svæðisstjórn upplýsingar um fötlun og félagslegar aðstæður umsækjanda. Svæðisstjórn sendir Tryggingastofnun ríkisins umsóknina ásamt mati sínu og tillögum um greiðslu.

Tryggingastofnun ríkisins greiðir vottorðsgjafa fyrir læknisvottorð vegna greiðslna þessarar.

Fjárhagsleg aðstoð skv. reglugerð þessari skal ætíð ákveðin til tiltekins tíma, þó aldrei lengur en til þriggja ára í senn.

Heimilt er að úrskurða bætur allt að tvö ár aftur í tímann, sbr. 56. gr. laga nr. 67/1971 um almannatryggingar, enda sé ljóst að sjúkdómur eða fötlun hafi leitt til útgjalda og/eða sérstakrar umönnunar á þeim tíma.

6. gr.

Framfærendum, sem njóta fjárhagsaðstoðar skv. reglugerð þessari er skylt að tilkynna Tryggingastofnun ríkisins eða svæðisstjórn um aðstæður, sem kunna að hafa í för með sér breyttar forsendur fyrir greiðslum. Sumarorlof skólabarna hefur þó ekki áhrif á greiðslur skv. reglugerð þessari.

7. gr.

Um ágreining vegna framkvæmdar reglugerðar þessarar fer skv. 7. gr. laga nr. 67/1971 um almannatryggingar.

8. gr.

Fjárhæðir skv. reglugerð þessari skulu taka breytingum í samræmi við aðrar bætur laga nr. 67/1971 um almannatryggingar.

9. grein.

Reglugerð þessi er sett skv. 3. gr. laga nr. 79/1991 um breytingu á lögum um almannatryggingar nr. 67/1971 með síðari breytingum og gildir frá 1. janúar 1992. Frá sama tíma fellur úr gildi reglugerð nr. 605/1989 um fjárhagslega aðstoð við framfærendur fatlaðra og 3. gr. reglugerðar nr. 116/1974 um úthlutun örorkustyrkja.

Ákvæði til bráðabirgða.

Hafi einstakar greiðslur, sem úrskurðaðar voru skv. reglugerð nr. 605/1989 og 3. gr. reglugerðar nr. 116/1974 verið úrskurðaðar til lengri tíma en 1. janúar 1992, skulu þær greiðslur halda gildi sínu til þess tíma er úrskurðurinn nær.

Heilbrigðis- og tryggingamálaráðuneytið, 22. apríl 1992.

Sighvatur Björgvinsson.

Guðjón Magnússon.